



INVESTICIJE Na Alipašinom Polju u Sarajevu

Otvorena nova poslovna zgrada koncerna „Agram“

Ukupna vrijednost 40 miliona KM • U sklopu zgrade i poliklinika s najmodernijom dijagnostičkom opremom

U sarajevskom naselju Alipašino Polje jučer je svečano otvorena nova savremena poslovna zgrada koncerna „Agram“, površine 10.000 kvadratnih metara. U njoj su smješteni osiguravajuća društva „Euroherc“ i „Bosna sunce osiguranja“ (BSO), „Agram“ i „Euroleasing“, stanica za tehnički pregled vozila i moderna poliklinika „Sunce - Agram“.

Ukupna vrijednost zgrade je 30 miliona, dok je medicinska oprema koštala deset miliona KM, što znači da ukupna investicija iznosi 40 miliona KM.

Općini Novi Grad 50.000 maraka

U povodu otvaranja savremene poslovne zgrade, koncern „Agram“ donirao je 50.000 KM Općini Novi Grad za izgradnju dječijeg igrališta na području općine. Donaciju je primio načelnik Damir Hadžić.

Posebno je interesantna poliklinika, koja posjeduje impresivnu dijagnostičku opremu. Tu je magnetna rezonanca snage 1,5 tesla, s najmodernijim softverom, kao i savremeni CT aparat, inače prvi u BiH sa dva izvora



S otvaranja: Moderno zdanje na 10.000 metara kvadratnih (Foto: M. Božović)

zračenja, što mu omogućava smanjenje krvnih žila i određivanje desetogodišnjeg rizika od nastanka kardiovaskularnih bolesti.

Obezbijedena je i najmodernija digitalna mamografija, dva RTG aparata, aparati za gastroskopiju i kolonoskopiju, pet ultrazvučnih aparata... Novina je i program dopunskog zdravstvenog osiguranja, koje će biti nuđeno kroz ovu polikliniku.

- Suština je da mi pružamo bržu uslugu, a paket polica koje ćemo ponuditi prilagođen je sadašnjoj socijalnoj situaciji - kazao je novinarima predsjednik Uprave BSO Željko Pervan.

Niko Krivić, predsjednik Uprave „Euroherca“, istakao je da je poliklinika „Sunce“ u Hrvatskoj rangirana na 100. mjesto u svijetu, a da će sarajevska poliklinika biti ili 99. ili 101. **Z. P.**